

四庫全書

集部

欽定四庫全書

文忠集卷一百六十九

泛舟遊山錄

宋 周必大 撰

起乾道丁亥十月盡是年十二月

乾道丁亥十月朔乙未早自白沙入小路數里游雲光
寺寺亦華煥登閣望六山圍屏欲少留而提舉常平李
察院領客將至留二小詩戲之云來如負弩先去為乘
驄避江祖一片石留伴幽人醉又云作者正七人飲中

空八仙長齋詎容醉晉也合逃禪遂同趙生過江祖興
道院主僧行餘置酒訪李白祠堂但有廢碑在壁角令
行餘導至石邊攀緣而下得小舟同泛清溪水正碧色
下淺灘數里至玉鏡潭水自南來觸岸西折彎環可喜
潭深則二三丈云李白詩云江祖一片石青天掃畫屏
又云溪水正南奔迴作玉鏡潭皆實錄也途中占小詩
云清溪水色勝於藍祖石移舟下鏡潭妙絕畫屏并碧
玉謫仙不見與誰談晡時回至弄水亭以玉盃酌趙生

徧飲其從者晚聞太守趙在九華樓上梁就見之

丙申赴州會

丁酉時候李倉再醵會

戊戌欲解維會大風雨湯侍郎之子新行在排岸文林
君濤江西運幹承奉君瀚伺候侍郎辛未同時知舉也
己亥大風雨夜行甚險

庚子早起四望皆銀山初不知夜雪如此諸公訪別已
撐舟數十步而風大不能進復泊亭下葉江州經過諸

公強欲同會遂衝浪解去薄莫僅至清溪口巡檢寨前
日本皆便風但舟不可出溪遂爾阻滯

辛丑雪晴早出江轉至池口即梁昭明太子所謂食貴
池之魚者有廟甚雅而俗呼郭西九郎終日牽挽夜泊
戚家港

壬寅東南風大作辰後牽挽至李王河口久之風定拋
過對岸入長風夾而止風色却轉此去皖公山百餘里
天色晴明方見今為石龍山所隔

癸卯早至宜城浣拋江午後入雁汊下口遇二兄十三弟資上人維舟置酒

甲辰為兄弟留一日再置酒北風甚大汭流之颿如箭予固應留也夜大風極可畏

乙巳早與兄弟別北風粗可掛颿才至上口遽止牽挽過趙屯望見皖公山夜泊汲陽汭四無人煙止可避東北風

丙午南風鼓浪去留不可迂二里入泊橫峰港風益高

不徙則今殆哉

丁未早風靜拋江中流望皖公山如獅象戲作小詩云
大婆嶺獨高秋浦皖公山正望龍舒端如牛女隔天漢
不似彭郎近小姑夜泊望江夾

戊申早行數十里日欲晡至孫公灣止登岸半里有居
民地名九鋪岡去望江縣十五里米盡潭州客舟張氏
送數升以果實答之

已酉昧爽拋江已而北風作過馬峰火磯亦小揚颿甚

馱午後風益高晡時至交石夾上口而止是日凡三拋江最後搖蕩駭人終夜波濤拍枕

庚戌風益橫白浪如山夜不安席仆檣以殺其勢既而徙寓民居終不交睫

辛亥風正北以艤泊未安趕白浪至湖口縣港僅能容舟水稍落則不可泊主簿劉廸功絳監稅蘭成忠漢傑權監鞠承節彭澤丞黃宣義炎彭澤簿魯廸功唐佐並相候黃丞季文通判之子魯簿已卯年宣城所解進士

也問淵明遺跡云舊縣有祠去今縣二十餘里唐末五代時徙今縣惟祠狄梁公亦嘗令彭澤故也登岸過上鍾石至崇壽院有澄軒下臨鍾石而為張巽縣尉所占約寺僧訪之山久榛蕪張自云近稍芟治岩洞間多豐熙崇觀以來士大夫題字其中一石高四尺扣之磴磴然東坡所笑者此也江水北來而濁湖水南出而清合流僅五十里方渾無為子楊次公一睽云濁浪自分清浪影真山徒作假山看語殊中的蓋山前數石絕奇巧

而不宏旺全類假山耳張生餉剗剗酒一盃不能飲命
車登嶽廟巋然山之上前列五峯殿宇數層殆一目間
高處可望淮南五祖二祖山次至下鍾石廣福院山路
梗塞攀緣而上亦有一石闊丈餘可扣擊他石則否然
則李渤所謂南聲北音者亦未為無據間水涯尚有一
響石而線路臨深潭蔓草蔽之予步往幾墮不測當昨
齒鐫銘以為戒也山椒地稍平處前臨江湖面對廬阜
左映井邑右帶洶河洲若創一亭當為湖口絕景江行

望上下鍾石皆截嶠數十丈及游其間則岩穴亦有幽
邃處上石尤巧晚留張巽飲酬盃酒之惠

壬子風平而雨揚颿掠大孤午後過長嶺十餘里遇鹽
船壞於岸前日同至交石夾商賈貪程夜冒大風至此
遂觸石可為無厭之戒晡後次南康軍水殊未落入泊
寨中太守史碩夫奉直簽判趙無悔宣教及楊德起解
元日新相候君伯母尚夫人之甥孫也終夜雨

癸丑欲遊廬山值大雨教授沈廸功元憲錄參呂從政

竣司戶

闕

迪功汝舟司理丁迪功惠卿司法張迪功紹

星子令京文林鏜新式寧主簿陳迪功準及其子新上
元尉矩添差都監劉脩武政趙徙義伯益監贍軍酒庫
孟脩武允武及其子孝純並相候劉政處州人嘗為御
龍直供殿繖云在殿陞間識予晚赴軍會

甲寅早楊德起同其婦來留食訪星子令京觀三不欺
堂京豫章鹽舖子也二十登科初任臨川主簿嘗至民
家晝寢夢若老媪祭已者既覺則媪諱之方祭亡子視

其貌與食品良同問媪子死之年月日正令生時此事
盛傳而京諱之後詢郡人云果如此又過陳準主簿宅
登樓望廬山及星灣有甲秀堂對瀑布香爐峯其家藏
黃太史絹寫金剛經十七分

乙卯拂旦出西門過開先路口數里由別徑入簡寂觀
宋陸修靜先生故居也其傍有嶽廟守者云先生煉丹
井已過回步訪之深三尺在田間酌訖乃至觀中陳賢
良記云觀在白雲峰下其間一峰獨秀曰紫霄其北又

有屏風山其前一里有鷄籠山觀門有朝真閣今廢殿
前有先生醺石亦名禮斗石道藏石刻銅天尊像石鑿
白雲樓經兵火今皆亡西澗懸瀑落於廡前亦亡甜苦
笋間歲一生相傳先生手種者邂逅章績自稱官人子
平狀元之曾孫知予中外親族甚詳豈詐妄與之同過
度仙橋記云許堅瞰衣石在澗中問道士則云沙石堙
埋久矣進觀連理樹乃黃連樹其大根又有一樹亦附於巨抱石鼎足而分次至
先天觀去官路里許兵火後破屋數間而已次至祥符觀舊名靈溪記云

三武士嘗棲溪側武賜名齊朝脩創南唐重修今石衢甚廣而屋宇極不振自此數百步即歸宗禪寺長老來迎飯而後行道中多三軍別祠即所謂三武士其名曰唐建威李德父宋雲刀正廟自歸宗登山才里餘又其上八里則紫霄峰頂有鐵浮圖九級藏舍利遠望如枯木而晉梵僧邪舍亦有墳在其側又三里有謝景先草堂乃杏林故地天氣未佳且有鄉導不果徧遊杏林者後漢董奉治人疾不敢貲使愈者人植杏五株然奉自

有太乙觀在山北或曰杏林在此而上升太乙觀耳記
又言歸宗後峰半在石室中有夏禹刻字僅百餘人無
復至者過歸宗望紫霄峰亦有瀑布行官道約三里入
小路訪栗里求醉石土人但云此去有陶公崖無栗里
曲行三里遇數道人草庵過庵背有崖古澗醉石在焉
仰視飛瀑披大石而下甚為奇觀石有坎處俗云陶公
枕痕也又指若虎跡者其說尤荒唐嘗記前人題詩云
五字高吟酒一瓢廬山千古想風標至今門外青青柳

不為東風肯折腰惜乎不記姓名餘具記中久之復出
官道訪謝康樂

闕

咸云地屬皇甫道人已樊之矣次

至黃龍靈湯院敗落特甚而湯泉固自若或題東坡和
可導絕句於壁間又十五里落路數百步至康王景德
觀觀對天柱峰倚凌雲峰兵火後殊草創其西有四庵
一院相去不遠而記中無所取故不往夜宿山月軒下
臨大溪簾水所注也終夜如大風雨聲

丙辰會慶節燒香畢早同道士喬太和渡溪入谷五里

有舊觀今為菜圃又半里至龍泉院破屋數間而已又
十里至董氏第屋疏食畢望簾而進此陸羽茶經第一
水也熙寧元年七月夏倚所記信而有徵倚言過石磴
路甚危蓋鳥道緣崖其下即澗壑又草木蒙密湏盡芟
去乃能徐步爾倚所謂平石可坐數人者正與簾對過
此則大石散亂不可行予跳躍其間從者皆驚逼簾濺
沫嘆人如霧雨毛髮凜然水初束於石硖勢猶未廣既
而散布傾瀉雖冬深水縮猶為十餘派聞山後乃開先

路豈非與山半之瀑同源耶谷中若用兩壯夫扶山轎則可代步然屢涉溪流春夏漲溢亦未易進也今日予皆徒行幸天氣晴和歸路方有微雨回山月軒道士喬太和猶未有飯且言嘗有雪霰谷中不知也去觀五里至荆林市是為山北江州境大風人不能立晡時至侯溪市入圓通崇勝禪院古有侯氏故以名溪長老不在首坐祖勝潼川人可與語同過旻古佛塔謁西堂脩誼故人惟納之兄也東塔廣福院相去二里寒甚不果往

步至磨院風益甚或云寺前山中有風穴故多風飯罷
登至樂亭觀李後主及昭惠后畫像訪清音亭兵火後
偶餘此亭乃摧壞弗治惟石渠二百五十丈尚無恙夜
宿寺中

丁巳早謁圓通殿會食於東軒方出昨夜疑大雪今日
天氣稍晴乃過甘泉市至七里落路飲廣福庵庵前水
即石門澗也同王僧惠辨行百餘步訪尊勝庵下有大
石高數丈長如之中若剗裁可過二三人謂之石門相

傳古有僧誦尊勝咒而石開遂以名庵庵對仙步峰又
數十步至保寧庵三面皆山其南石柱峰在焉次度橋
上雙龍庵過此直上天池十五里或云兩傍通謂之錦
繡谷蓋春山花盛開望之如錦繡云山路峻甚每三四
里輒為亭以憩凡五亭第一亭跨澗頗雄偉行至半山
有處州道人草庵在錦繡峰之下指其旁以為竹林隱
寺游人或聞鐘鼓聲而寺隱不見由道人庵而上路愈
峻過第四亭有大石凌虛而出可坐十人一月千里略

無蔽障平視一峰上有巧石

俗呼香爐峰以山記考之乃東林化成路

停午

至天池禪院雖鑿二沼其涸可待所謂天池今不可到
號曰龍潭又鐵船峯下亦有黑龍潭祈雨則至焉長老
不在同首座道徹登文殊亭下視鐵船峰望石門澗自
山委蛇而出直達於江然則尊勝庵之石門非水源矣
院有崇寧間西天僧金搃持像及貝多葉梵書數片并
佛牙觀畢同道徹謁隆禪師塔其傍即定心石也道徹
指其前一峰為十八賢臺未知是否新羅岩草深路迷

不至歸院日方斜復度嶺行二里許至主簿塔

頃有主簿於此

遇文殊勝境立石塔遂以為名今秋雷擊其頂

洞視空濶又非第四亭而上

可比東西二林歷歷在眼而江州屋壁已可辨有九十
九峰磬折如城堵然此登眺最佳處也稍前至佛手岩
雪花滿樹庵門尚閉乃知昨日大雪今日驟霽望南山
雪氣猶未散賦小詩云十日頑陰不見山山中一夜雪
封庵伊予的有尋山分日照北山雲在南每歲九月便
有雪至三四月乃消雲岩石空洞不止容百人下有泉

水道徹云岩上五峯如指故為佛手近為野火焚裂矣
緣岩後細路數百步東望一峰即舊峰頂院今廢或云
其間方是錦繡谷達於平田又下視磐石相傳遠公講
經臺也由佛手岩二三里度小溪乃至大林寺遭野火
僅有其基趾其額為馮教鍊者徒寘墳庵今一僧據其
田人無知者予按白樂天詩心竇慕之物色乃能至其
傍小徑即山下南棲賢路也地在山頂而反平衍謝靈
運詩云冬夏共霜雪其高可知予作弔大林詩云上盡

諸峯地轉平天低雲近日多陰古來南北通雙徑此去
東西啟二林虞世南碑徒泯沒白居易序合推尋康廬
第一金仙境忽使如今遂陸沉黃昏歸至天池禮文殊
求燈閃爍合離或在淮南或在近嶺高者天半低者掠
地又賦小詩云代馬腥膻暗五臺南方世界且徘徊一
燈便是真知識不用奔波學善財是日雲散日出寒燠
中甚愜素志山中薯蕷花全類蝴蝶又有萬年松羅漢
線菩薩石即記中所謂白石英也

戊午早同道徹下羅漢岩上微雪山半乃為雨矣由石

門澗出官路稍前即岳家市

岳飛葬母於此故為市

自此可上化

成不惟足力有限入山記止言石盆之美而樓閣已非

昔遥睇而去回視文殊亭渺在峰頂主簿塔僅如枯木

佛手岩屋彷彿可辨始嘆昨日登涉之不易也午後至

林口市

謂二林之口

過香谷慧永禪師塔入西林寺即慧永

道場也流水瀲灩循階除賞玩不能去寺不經兵火但

不葺爾牛僧孺書寺額佛像獨被冠纓訪水閣院已廢

但存浮圖七級次至東林晉慧遠法師道場法師雁門

人虎溪在寺門之外山記云清溪有亭今廢牛僧孺太

和四年書神運之殿今非其舊南唐玄宗題神運木今

亡流泉匝寺下入虎溪殿後白蓮池如故晉輦或云政和間太

守焚藏經院白公草堂今焚毀但存階城前對兩峯其側則鷗冠峯右望天池四傍多

水雙玉澗草堂在半山二泉出其右銅像今作大士裝飾觀其豐下直明皇也唐壁

畫等今亡上方舍利塔南唐保大年顏魯公題名碑尚存

上方之北虎跑泉深八九尺五彩閣閣後作像十大釋迦入滅臥弟子環泣

甘露戒壇亡今其西石磴三百級岳飛母折樹墳滴翠亭殷仲

堪聰明泉

在寺中

佛影臺

亡今晉朝三杉

為岳飛取去

是寺最為

古剎而兵火中巋然獨存入門樓閣華煥宛如仙宮長

老本然自號渾融師官族也共飯畢同訪遠公塔郭甫

作重功脩碑次至照覺佛海二塔歸登五百羅漢閣望

諸峰閣下即內三門也由東林二里至廣福院本大明

公廟

保大五年陳元裕撰記立

靖國元年封靖明真人記云真人姓

匡名續字君孝出自殷周之際此山或云受道於仙共

遊此山人謂其所止為神仙之廬因以名山或云匡俗漢人漢初封越廬君故曰廬山次至太平興國宮街衢門闕氣象清華劉越石高三四尺根植地中在宮門之外仙鄉亭廢矣宮倚聖治峰正殿惟設採訪使者像其後乃太上本命殿兩廊繪使者變相儀衛次以五百靈官又其後有雲無心堂臨流水可愛道士皆星居有劉烈者號虛谷先生嘗進易解云知宮宿不果登新創鐘樓而行樓名景物華麗殊甚日落至清虛道人皇甫坦

庵飲罷館焉被遇太上結庵撥雲峰下自言兗州瑕丘人久在川峽嘗遇朱桃善推算布氣時時書字決人禍福或云年七十二山中道士言其顏貌已不建二十年前矣近損足未能步而茅山張椿齡亦被遇太上今年亦得此疾異哉庵側有泉太上題曰神泉又為閣以藏御書及像設

己未早皇甫道人再具飯訖行數百步至雲溪庵自此若出官道則過妙智院及蛇岡

即風神化身之處也

予欲趨太

乙宮或謂小路差近乃過擊牛墩皆第峽峻嶺亦六七里方至即董奉上昇之地大槩二十一日已記之其事出葛洪神仙傳觀在蓮花峰下不經兵火有昇元六年韓王知證記是時猶謂之廟保大十二年記則為觀矣宣和二年封奉為昇元真人觀中猶種杏前殿一株甚大其後又有種杏軒春時不妨宴遊也老道士蕭惟億年七十餘未出門視其貌盖有所養者自觀五里至禪知院以其為舊屋故游焉記言院後有綠野亭忘記詢

問進至雙溪寶巖禪院再飯同長老世題步過雲慶庵
記言因流泉為池多畜魴鯉今僅存坳窪耳假世題之
驀令庵僧致康前導過寶積庵殊不葺治但有程公闢
師孟詩刻訪白雲亭已為王秀才治其塚上披荆棘尋
所為磐石鳴泉久之方見泉石誠佳而又北望湓江宜
陳舜俞以為山北最佳之庵北去江州纔二十餘里山
北之境盡矣跨驂五里上吳章嶺亂石聳牙頗亦險峻
嶺脊分江東西兩路界過界便見五老峰是為山南嶺

下有小路至知林淨慧院昭德觀會日斜僕疲乃由官
路過大富莊至相舜橋已昏黑秉燭夜行至尋真鋪風
大作入小路二三里敲觀門道士疑為盜久之方出真
誥言廬山乃元辰福地而此觀為第八詠真洞天五
老峯正在其後而倚香爐峯

庚申登採訪使者閣望五老峰記言漢武築羽章館於
屏風壘下臨相思澗今五老之峰壘石如屏障蓋其地
故自閣而望相去若在百步間廬阜之早觀也為題其

榜曰雲錦閣取李太白屏風九疊雲錦張之句云五老
第二峰即獅子峰與九疊屏相連山無草木曉日照之
殆如赤城龍潭在觀後一里水作琉璃色其中數尺正
黑知觀湯善翔云深數十丈蓋洞天之門云潭上有龍
王祠疑郡記中所謂綠淨亭也已初借善翔小驢令四
明徐道人前導過永福院舊名雲龍煨燼之餘方稍葺
治次至壘石庵蓋近世僧德正所創門外大石長數丈
復壘一石前眺江湖宛如池庵背即五老峰乃几案間

物陳舜俞以末見蓋後來庵宇之絕景也次度華嚴石
橋華嚴院今廢次至折桂院今名證寂折桂因唐李逢
吉得名記言山名幡竿源而土人不知登南唐惠濟禪
師石塔有巢雲軒而記不載不經兵火氣象便可愛前
有僧房可望湖而不見山次至解空院其傍聖果院已
廢次至谷源庵地形甚高面對重湖記言墨石奇偉豈
謂德正之庵耶後有幽泉但屋弊無足觀者自此而折
小僮指路迂枉忽下峻嶺木葉被霜滑汰幾不能移步

至雲臺庵乃得平地庵後石崖如記中所載次至淨妙
院記云古名青牛谷即楊衡所謂隨雲步入者儼然如
造仙境門外數十步回望五老及他山如圖畫凡此寺
觀庵宇大抵環繞五老峯每至一處山色峯數輒不同
造物之無盡藏也獅子峯尤肖今日但少雲氣飾之次
至承天白鶴觀唐混成先生劉玄和故居舊屋偶存獨
無廊廡唐杉圍二丈在門內問東北木瓜岩道士不知
觀前百餘步出官路過三峽橋遣從者先入棲賢獨與

徐道人携二僕復由小路為卧龍之游初過中興庵次寶慶庵近有一道人主之西澗即劉凝之庵無知者既過澗徐道人迷路度峻嶺踰棧閣遇炭窑方知路窮得一夫引至上偃臺即祖教院亦無僧行至此又盤一嶺至卧龍新庵有江州蔡道人主之復行半里路舊庵基落澗乃至其處蒼崖之下怒瀑淙擊高十餘丈與九華上雪潭爭為雄長凡陳舜俞所記一無夸詞今不憚崎嶇險阻凡以為此未至而悔既至則樂以忘勞焉舊庵

隔溪岩石層出粲如百疊之雲中有流泉注於澗亦一
佳處也望五老峯甚近香積院在其下業留從者於棲
賢遂問歸路數里至幽邃庵今為尼居主者覺殊鄆人
壁間刻馮京詩蓋嘗讀書於此庵前度溪至上塔記所
謂拭眼禪師石像如生者舊屋甚整潔大竹成林酌飛
錫泉登環翠閣望五老峯背至此下山數里即至棲賢
嶽老不在藏主可昇眉州人與予同年出程子山詩泉
老頌且求一語為占兩韵云我比同年百不能只餘霜

鬢愧師兄殷勤覓句無言說共撥寒灰聽水聲寺今春
稍葺但殘僧四五皆不稱大刹飯罷同昇上人過五老
玉淵二亭山水不辜老眼而足璽矣遣人至軍城招妻
孥來早會此

辛酉拂曉自寺後渡澗行里許過百藥灘石崖坡陀道
人於此曬藥陟小嶺度茅岡約四五里並五老峰至明
達尼院

師亦拭眼禪
師道場

冰霜滿履扣門久之方開蓋舊屋也

同尼師登凌霄岩岩在平地奇石如岩古有僧坐禪其

間繞洞別過石門謂之喝石其前一石甚大即記中所
謂對五老如賓客者傍有石岸亦可愛出門數十步望
宮亭橫出而楊澗左右相對落星僅如葉舟惟軍城為
紫荊山所蔽耳回過百藥灘分路行三四里入楞伽院
亦古屋也正倚朱砂峰舊號白石佛殿創於保大中釋
迦像與西林同李公擇尚書藏書閣在東偏元豐以後
留題皆存有趙天啟者歷叙公擇作中丞劾蔡確故改
戶曹云云西廡有東坡所作山房碑又刻南唐佛像野

夫公擇及黃魯直皆有題字崇德君墨竹高下三枝在鐘閣蓋公擇妹魯直妻也寺門外即上天池大林路至為險峻老僧惠寶生於元豐八年云自此別有捷徑約三里過澗入棲賢磨院院在石人峰側又里許遂至棲賢骨肉方來同觀玉淵先是澗水犇衝遇大石上侈下仄懸布瀑勢極其雄壯濤頭洶湧散為玻璃色記言沙石萬數古今不積誠下通於海矣相對有寒泉亭泉自山出又按記文訪羅漢岩寶陀岩於僧堂之後皆無知者

山上竹樹間多崖石其下有觀音泉疑自寶陀岩而出
稍加剉治必得之其南有小徑疑白雲庵路也飯罷徐
道人騎驢歸再過三峽橋徘徊久之始知過橋之泉為
陸子泉其傍有沈錫大書廬山二字行小路望五老峰
了然便道入高遙景德院亦舊屋有元豐間無為子題
字老僧年八十云李徵古書堂去院僅一里今廢但刻
其名氏於石洗滌乃可見進至萬杉院上滴翠亭又二
里入開先登漱玉亭度橋俯澗澗中石舍雲母如記所

云天寒甚太守適致餽徧飲從者而行門外招隱橋近
為寺僧徙數十步而招隱泉無人知者物色久之得於
二百步外叢篠之後石井依然三酌而歸路口有披雲
亭稍前即古楊梅亭基又稍前當四達之衢即古四會
亭而俗子改曰屏翠矣回望山色奇甚紫霄峰劍立衆
峯之間鉄塔僅如一線將至軍城一里有承天院臨溪
湖僧嘗被盜殺三人今遂不振入西城日已暮聞新成
都漕鄭少嘉察院相待移時留書而去昔白樂天記匡

廬竒秀甲天下誠非虛語陳氏山記北起江州畫圃乃
轉山南起康王觀迄於吳章嶺其序如此予今自南而
北與之相反故問津多誤然記中指名竒特處十得六
七其餘當路者遊迂曲者畧異時再以旬日窮探極覽
可使無遺蘊矣初南唐元宗賜田給諸庵岩故所至有
產業中經李成焚蕩十存一二又稅重租薄僧道往往
逃移寺觀日以摧毀近雖稍修復而廢絕為多惟舊屋
則氣象終可愛舟中賦四韵云南北周廬阜東西徧九

華宴安無酖毒痼疾有烟霞淡泊村村酒甘香院院茶
馳驅君莫厭此出勝居家

壬戌五更雪打篷平明出別郡官望廬山已橫白練欲
解去而南風作章得象遊落星詩云遊來未盡登臨興
且喜南風阻去船殆為予設飯罷遂携家童棹小船往
焉寺去軍岸僅五里水乾則路通今歲尚深丈餘按圖
經石高五丈周回百五十步九江記云尋陽湖內隕星
化石上連彭蠡下接尋陽其石圓潔不生草木峭然孤

峙獨出波際興於唐景福天祐二年賜後福星龍安院
本朝祥符二年例改法安南唐戊辰歲宣義郎湯淨撰
記云保大中寺僧修葺玄宗嘗臨幸僧齊已范文正公
章郇公王介甫平甫程公闢蔣穎叔黃魯直父子郭卬
甫洪駒父皆嘗留詩又龍圖閣學士吳仲庶酷愛西軒
更名嵐漪魯直詩云龍閣老人來賦詩謂仲庶也山色
滿眼湖光千里真世間之絕景又嘗有玉京軒今皆廢
但存清暉閣西對廬阜如天翠屏初至白雲英英起山

腰少焉散漫俄復退歛已而山披絮帽變態不常舉酒
賞之不覺徑醉午後移坐佛屋之前東南觀巨浸右為
揚瀾左為左里其中兩山如門是為鄱陽湖由寺門而
望則東北直宮亭湖西南軒窓對流清山其脅亦有湖
汊西北乃軍城再舉酒而歸晚自舟中望山色不勝眷
眷再以小艇入西草湖過東右山下觀釣魚臺鴻雁鷗
鷺徧野見人驚飛轉而之流清港上流清庵庵在鳳凰
山古殿殘僧慨想承平之遺址回棹已曛黑過落星聞

鐘聲往復殆二十里

癸亥早發南康北風微作已而轉南過左里揚濶泊珠溪而北風復作去軍已八十里有巡檢司及小市登岸北望廬山

甲子南風晡時方行十里至吳城山謁廟畢登望湖亭猶見廬山也殿左有穴如屏異時湖中或損舟則見於穴中謂神倉云

十一月朔乙丑風順行百三十里矣夜宿連前渡雨

丙寅日南至享考妣雨作而風順未後抵豫章泊南浦
亭亭在洪橋門職方乘云對岸即殷洪橋投書渚也亦
見水經卽沈持要漕江養原及府官相候報謁邊倅維
嶽同登柱頰亭望西山以陰雨不快心目又有可齋陸
務觀所立也宋晉裕來知其叔嘉正今夏不祿

丁卯三倅

邊朝請劉敷文
兆佐胡奉議偕

轉運司主管官汪朝散邁

帳幹許承直可久幹辦公事周文林閔黃吏部然及其
叔李文李常州安國司馬總領倅李靖州漢英王提舉

淪王南劍岡向郎中訪並相候游鐵柱在小池中高二
三尺狀類假山道士云每歲池水溢則江漲枯則江落
今歲反是傍有銘紹興五年帥胡世將為之張法師者
年八十餘健甚奕極高晚易漕舟置酒留孟周叔宋晉
裕益師

戊辰安撫司機宜梁承事李琦司法王脩職中復新建
丞諸葛從政餘慶監稅詹迪吉華蔡承事嶠及其弟嶸

宋景融
之婿

並相候赴府會登子城南樓望江心小山

已已赴漕司會於觀風堂將仕郎可撫守禪之子同其

婦六娘來舟中

六娘陳德夫妹終日雨

庚午早留劉錢壽知縣陳希魯教授飯未後赴邊倅會
登柱頰亭望西山子夜方散家人招孟宅安婆來舟中
卒未上藍長老了賢携素饌來留孟周叔同享洪駒父
職方來載寺有蛟井事以問賢老見說無據謂前京西
運判韓宣教子東曉其高祖蓋忠獻王之兄弟久陰可
厭至是晴

壬申赴府會於王閣天氣晴爽得西山之勝職方乘引水經及十道西蕃志云西山一名厭原山

癸酉致政趙通直昌相候同年也赴胡劉二倅會胡倅送步障式俗名畫獅蓋胡人飾以氍毹而畫獅子形故云爾或云名掛愚

甲戌陰總管劉源相候即金陵舊都統也出北門過天寧寺同長老登列岫亭得西山之面又過大梵寺登秋屏閣職方乘云不知誰所立但引曾子固云見西山正

面如畫者此閣耳又過薦福寺觀淺沙泉馬跑泉寺有
鐘光化三年節度使鍾傳造訪黃超然求觀山谷遺墨
但有枯求道士賦寄老庵賦煮茶賦薄酒詩又永州
化光仁老畫水石二軸其一題云湖北山無地湖南水
接天雲烟真富貴翰墨小神仙復有跋語韓子蒼各題
一詩晡後至上藍寒甚食於賢老之室擔跋道士來談
命次至觀音院即杜牧為韋宙撰文以石亭覆之因號
石亭者有鐵羅漢五百是日即報謁復游覽終日甚勞

乙亥廬陵進士余允武知柳州林奉直振並相候赴汪
漕會於列岫亭酌淺沙馬跑泉程公闢嘗作雙泉堂潘
興嗣為記其傍即清源真人祠所謂灌口也舊皆在城
內李伯紀紹興初為帥損城使可守遂在城外然甚闊
亦未易守也

丙子赴沈帥會於孺子亭亭在東湖陳阜卿所創四圍
皆荷也徐宅名見水經又有徐賢亭職方乘詳載

丁丑早別帥漕人事擾午時方能定以小舟截江為西

山之游初至沙井口按圖志云在章江西岸石頭之上
許旌陽謂吾升天後一千二百四十年豫章江心忽生
沙掩過沙井口是八百人得仙時也今相去者尚數十

丈陸行二十五里至貞觀院

舊名福林

登閣觀禪月羅漢摹

本真本在雲堂

又五里入上藍莊又五里至吳靖州百思慎

之墳庵又五里而遠至鸞岡三徐蓋葬其傍三徐者衛
尉卿延休騎省鉉內使錯也元祐八年張商英作祠堂
記今有畫像或謂其墓為耕者所壞猶存齒髮或云徐

氏墓在博士壙去此猶數里而翠岩寺以鸞岡為按山
恐村民鋤掘故言徐墓商英以之實云稍前即翠岩也
棟宇深隱氣象闕壯南唐保大間有澄源禪師無殷住
此山李主甚敬之既死祭以文時本朝建隆元年也韓
熙載為之銘其後死心居此而雲峰悅亦悟道故江西
號為勝地飯罷同長老子堅步觀洪崖井深不可測舊
有橋跨其上今廢寺引崖水以給用又匯其流激大輪
為磨院去崖數十步有奉聖宮今曰紫清徐鉉為記有

唐肅宗像道士僅數人歸宿翠岩方丈觀李主賜無殷
詔書皆用澄心堂紙每畫日後即押字印文如絲髮近
世自王元之而下留題甚多予亦題云李氏世敬桑門其
賜書徧江左諸刹至於不失舊物如翠岩者鮮矣又有
郡人潘淳奉議以其祖侍讀所藏太宗真宗兩朝御書
墨本數十軸寄寺中又有程公闢與南禪師唱和皆取
而觀之惟所謂唐人寫經則非也

戊寅早乘小車循溪依嶺行一二里望所謂藥臼者在

石澗中如石盆然次度牛欄嶺茶園嶺最後度湯家嶺
回望生米洲及至香城寺榜曰咸通香城蘭若八年鎮
南節度使嚴景書東晉隆中安曇題肇居此山嘗與陸
修靜推論見北齊高僧傳今長老如晦妙喜弟子也方
大側婆羅樹兩株葉皆下垂又有羅漢菜嘗以正月生
飯罷杖策登山初過樞林其間一株最大者圍丈五號
將軍樹相傳近千年矣程公闢詩云金賜雲中若有聲
野僧同我上山行千年大樞婆娑在老似將軍擁萬兵

次至舊院居址次至硯石長一丈四尺闊六七尺程公
闕詩云石頭如硯貯寒泉今古無煙水自閒待把萬松
燒作墨大書長句滿西山次至靈觀尊者坐禪石次至
屋壇高六尺闊七尺是為香城絕頂靈觀者隋開皇初
新羅沙彌也為北禪行道求價尋償夙仇而終自寺至
此五里積雪猶未消遠眺章江畧見府城山後即江東
建昌縣界周覽移時復至寺中讀順禪師碑二蘇詩刻
潘詞記文慈順塔記遂還翠岩日方晡矣同堅老登愈

好亭在寺後前長老了因取寒山頌中微風吹幽松靜
聽聲愈好之句而為名自作記粗可觀望寺場左右環
抱而鸞岡正當水口即三徐祠堂也方丈之後有半軒

池似半月

蔣穎叔有詩又有聽松堂熙寧間潘興嗣嘗作寢

堂記澄源塔在寺右大竹成林圍尺五六傍有齊王廟
即李王弟無為牧景達也亦署澄源勅嘗捨田入寺故
廟祀之法堂左階花塼猶是南唐舊物隱起之紋皆踏
平向來僧徒大集故也晚再同堅老及西堂三人過洪

崖俯視深潭草木蒙蔽岩谷峭絕不容側窺而水聲洪
洪疑其有異乃並澗十餘步披草而入始見硤中石數
十丈飛流而激浪數節傾射而左崖懸瀑數道相去三
丈妙絕不減棲賢之三峽又其右多盤石可坐前此僧
道皆不知但窺井而已若非再至幾成徒行土僧善權
巽中舊題詩云水發香城源度澗隨曲折奔流兩岸腹
洶湧雙石闕怒翻銀漢浪冷下太古雪跳波落丹井勢
殺聲自歇散漫歸平川與世濯煩熱飛梁瞰靈碧洞視

疎毛髮連峰翳層陰老木森羽節洪崖古仙子煉秀搗
殘月丹成已蟬蛻井臼見遺烈我亦辭道山浮盃愛清
絕攀松一舒嘯靈風被林樾尚想騎雪精重來飲芳潔
亦佳作也前登長老應通廬陵人過其寮飲湯

已郊拂旦游洪岩資禪院去翠岩十里而近道中石澗
湍流淙激可愛度落馬嶺乃至長老法遵禪院本丁住
持白石道者知新所居殿宇甚小法堂已摧寢室窓外
對梅嶺如屏障真宗嘗御製詩四篇賜知新有明珠為

戒曾無玷拳石留糧永不饑之句謂其煮白石而食也
其餘勅劄皆在又有小金龜重五錢沉香刻三教像一
龕人物極小又佛像一龕金字法華經七卷銀字法華
經七卷夾頌金剛經一卷菩提菜四片文殊像羅漢十
六軸佛一軸道者真馮極贊一軸皆賜物也知新又嘗
住西京應天院歸飯翠岩同堅老及二三同遊再過洪
崖茭草開道坐崖石汲泉烹茶縱觀飛瀑而行堅老遂
別三徐祠下至江頭僅三十里昨日蓋誤而迂也新昌

尉周廸功承勲希稷留刺夜來大風歸舟猶未息晡後
掛颿汪養原運使飛蓋岸邊大能留也行十六七里泊
石州夾李全持永和書來

庚辰五鼓雨雪交作乘風而行辰時至生米鎮玉隆人
轎未至以小舟游至德觀觀在洲上四面皆水相施肩
吾釣臺唐則天時彗起置觀兵火後重造尚未脩惟壇
上栢一株甚大云彗起所種也有軒臨江可觀命二道
士奕謬甚取酒飲之并飲知觀胡天常午未間玉隆人

轎方至不果行劉信自府中來

辛巳黎明携家登岸雨雖止泥淖沒骭肩輿者甚勞約四十里乃至玉隆是為道家逍遙山福地前有胡詹廟漢州二吏次度龍岡橋按玉隆在西山之南初不見西山惟此橋畧見之而言西山則起於玉隆終於吳城山其間寺觀約數日可周又有天寶洞在三十里間云次有龍岡亭八月一日開觀則以七月二十八日於此設淨壇醮知宮能師古副宮能大正來迎館於逍遙閣下宮本

金氏宅許旌陽求得之晉康寧二年八月一日受命十
五日上昇初名逍遙觀徐鉉篆額大中祥符間改為玉
隆觀政和二年封神功妙濟真君如玉隆萬壽宮之號
仍繕修之東為三清殿次真君殿次道觀皆橫列為屋
數百楹真君殿前古栢圍丈五尺其半已枯每歲八月
開觀時四方之人紛至採其葉以療病左有丹井已竭
右有藥臼石函臼亦裂矣又有修竹鐫刻姓名甚多止
曰戊辰歲疑本朝開寶間物也宮門外有大周洪崖山

洞真先生胡尊師碑司馬真繹碑言尊師名超

即慧超

長

安三年葬盱母靖之西舍近山道言靖猶釋氏精舍也
今盱母靖在逍遙閣牆外亦有巨栢圍丈五而不枯舊
有亭今廢此去筠州及奉新皆六十里

壬午早焚香畢再周覽而行宮西面百步有小觀榜曰
太虛真人上昇於此未後復至生米鎮解維牽挽纜十
餘里宿下石溪

癸未無風行甚緩晚泊市議筠河向此出人煙甚盛號

新義鎮聞歲有火災

甲申無風晡後過撫州河口夜宿栗絲灣

乙酉雨阻可掛颿早至曲江鎮去豐城十五里趙常熟
無咎來迎同至其所寓正悟寺有板碑記寺興於隋而
葺於偽吳乾真中殿背面壁分書驪山華山圖云是郭
熙筆臨流有觀程子山嘗留詩無咎云對岸漁者近獲
古洗鏤宜侯王三字又有器刻陽遂富貴等字次豐城
李宰原馮察推師直吳宰千乘並相候祝南安深羅歸

繼至畧觀寶氣亭夜留馮察推飲雷雨交作

丙戌風順冒雨行四十里厨船觸大舟幾覆與去歲遇風濤之地相適也晚未至樟鎮七八里宿

丁亥午後至臨江軍太守李仲權通判趙奉議伯濠錄參靳迪功師益司戶章迪功子獲知清江縣張宣義陶丞趙承事彥禮主簿桂迪功隨主管王隆觀任朝奉詔子嚴新知興國軍向朝奉澹伯海新通判邵州向奉議詔伯元軍學教授唐迪功友聞新吉州教授楊從政愿

謹仲並相候唐楊皆同年也訪王元老寺丞之妻宋五娘家元老鄭人宋即先妣外家其子珏權新州陽春今以死泊舟行衙即貢院也

戊子早至軍學觀石刻赴李守會軍治據富壽岡後園有清江臺對閣阜山山雖小頗類康廬江心又有蕭渚晚別任子巖同遊盤園飲於喜歸堂二鼓歸大吐

已丑軍中以久雨祈晴赴向伯海兄弟會鄉林益葺歸已日暮移舟光孝寺下是日欲留兩同年飲客衆不暇

以酒果遺之軍治側有中大夫曹戩家因鋤地得古墓
槨朽而棺如故其中皆清水遺骨具存木梳猶在驗埭
志云開寶年葬筠州某鄉村蓋此地初隸筠後方置臨
江城郭遷徙如此江漲

庚寅早移舟慧力寺下携家往游去歲至此亦是日也
已初解去風稍順至石口亦暮夜距清泥尚數里離軍
才四十餘里耳終日對閣阜山聞自永泰陸去可三十
里來歲當來遊

辛卯風正巳時至新淦縣宰陳通直浹臨江判官張文
林權立之新吉州永豐縣謝廸功承休蔡秀才煥克明
謝生鑄致政楊宣教扶圖南並相候餘客皆去歲相見
者報謁過市中謁陶母墓有徐錯碑陳德夫侍其母及
歸妹來舟中具飯待之楊圖南送所編玉笥山寶籙
壬辰廬陵丞胡從政思成經過相候辰後解舟晚泊峽
江灘下非風力不能至也

癸巳早上峽江灘望玉笥晚將至桐江宿

十二月朔甲午午後十四弟平上人來迓得胡邦衡梅字韵詩荅之過元潭登從元觀觀有許旌陽劍其長不盈尺未必舊物也殿對大樟或云旌陽手植其上数十步江水盤渦潭在其中或云封蛟之穴也望山頂有石相傳旌陽試劍石也晚過元石灘即宿勞橋

乙未長道及永和相識皆來迎同至吉水縣少泊知縣左奉議郎楊獬太和主簿右廸功郎王正之監酒稅陳承邦節傑尉倪廸功邦基萬安主簿朱從政霖新郢州

長壽尉馬之印任趙監廟善繹承信郎彭思元並相候
午後與長道陳立夫小酌乘風解舟晚泊梅林渡

丙申早乘風至齊虹亭守倅及郡官來迎弟姪甥自永
和來邸報十一月四日行朝大雷電以雨五日降詔責
大臣九日宣麻左相葉顯右相魏杞並以本官宮觀陳
俊卿遷參政劉洪除同知

丁酉雨赴州會

戊戌臘大雪已後至永和歸家飯訖胡邦衡相候招季

懷以小舟置酒同至值夏報謁已二鼓復飲三杯欲順
流歸以月黑而止

已亥早還舟中具飯留長道七兄及鄉人孫次山司法
蔡伯高興伯

庚子同老妻至寺居以經水柱朽稍葺之

辛丑陰雨不已七兄來舟中小酌連日遣數處投書人
頗勞

壬寅莫長岡趙從政彥侁自城中來留飲

癸卯前寧都宰周通直繪朱泚朱岑兄弟並相候
甲辰馬伯達相候清之子也兩日方晴霽晚復雨

乙巳午後遷入舊寓

丙午家集遣漕舟還豫章

戊申至長岡赴長道會晚雨寒天氣殊靳晴

己酉早留武次韋飯晚待陳平叔

庚戌早令照老待隆慶達老又待本覺僧本崇及青原
行者祖稔崇將守罔極庵稔幹莊也晚餞七兄

辛亥早至江頭送七兄及嫂如衡陽具飯待長道及孫大同司戶

壬子立春舉杯應節

癸丑晴崇上人過罔極庵

甲寅早留葛德源飯午後小兒醫范世事來亦飯之

乙卯缺

丙辰早微雪旋霽招長道飯趙從義適至同之午後頭痛甚以昨夜久坐感寒也

丁巳缺

戊午樂順之自青原來因招長道共飲得武義兄十一月十六日書聞未得代


已未缺

庚申季懷以小詩送六出梅一枝自歸今日方到西庵
梅已爛熳

辛酉聞大兄為婺守劾不督財賦恐得祠

壬戌崑山遣徐與至聞外舅以十月二十六日葬

癸亥黃昏雨霰享外氏



文忠集卷一百六十九

欽定四庫全書

集部

文忠集卷一百七十一

詳校官庶吉士_臣李傅熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣李如梓

欽定四庫全書

文忠集卷一百七十 乾道庚寅奏事錄

宋 周必大 撰

起四月丁亥止九月辛丑

乾道庚寅南劍守關到法當奏事以四月六日丁亥挈家泛舟入浙

丁亥早發永和鄧庚子長才偕行伴綸讀書也入城應接人事泊舟候春亭守倅來餞飲乙夜散與兄弟宿亭

上

戊子早三兄先歸江漲風靜俄頃至吉水縣官相候弟
姪甥與送客皆還惟求和十七客少留因置酒焉晚同
長道赴莫宰會

己丑早放舟至白沙挈家過羅陂赴羅子行夫婦及其
兄思齊會蕭伯和授詩及新業南方風大作繼而甚雨
夜歸宿舟中小婢溺

庚寅辭羅氏會白沙相對有石牛潭其岬即隋已前州

城聞尚有故基及南郭之名

辛卯晡時劉子澄子和舟來同長道子行會飯於江閣
長道辭歸

壬辰早發白沙羅思齊子行蕭秀才特起送別於十里

外晚抵新淦縣權令樂安城丞程從政

新安人
諱說

丞許修

職

潮州人
諱孝譽

簿彭叔牙監稅黃廸功

提刑郭滂
之孫諱溥

楊圖南張

司理械董縣丞亮

字伯龍

新湖北提刑司幹官余廸功永

錫及其姪鄉貢進士誼並相候永錫蓋始興襄公之曾

孫今襄公諸孫或在曲江或在西山皆為農惟居新淦者為士人永錫以隆興詔書求勲賢之後得官

癸巳早十二弟婦之母郭氏及韓保之侍郎之孫十五郎霸來舟中留飯晚赴董子羽會

甲午早發新淦南風浩然午後至臨江軍泊貢院前太守施承議興祖判王朝奉同老知清江縣李承議端卿丞李從政昱知錄王從政子溥監贍軍庫李迪功祥監稅劉從義宗孟及向伯海之壻來司理

文淵藹之子

韓尉齎

新常德倅郭仲質份並相候併招楊謹仲劉子和子澄
飯韓戴甫及十五郎送別予戴甫名翊胄與竝胄竝胄
皆節之和之子得豫章報三月十五日改除閩憲

乙未新邵倅魏大夫彥悅張直閣永年

叔萬臺卿之子

何秀才

光顏

韓保之壻

並相候軍學教授張廸功沒新宜春尉彭廸

功龜年新衡陽簿陳廸功琦並惠詩赴任巖運使會盤
園廣袤數里高下因山川甚有野興

丙申新淦巡簡潘成忠岑李深之絳並相候赴程德遠

經略會於慧力寺之江月軒

丁酉訪向伯海徧觀蕪林園亭海棠數百株在南埭如
醪醖洞花時亦佳哉晚赴軍會

戊戌早解舟未時抵豐城縣泊寶氣亭李令愿韓承淳
監稅高炳簿何煒馬君壽朱秀才祺國寶宮教陸朝奉
筠並相候

己亥早赴清都觀正法寺開啟天申節清都本甘真人
之舊宅云遞中接收閩憲信劄午後胡從周參議來自

隆興晚赴李令會清擬堂舊有華亭今存遺址

庚子家人赴馬君壽內人飯

辛丑晚赴朱秀才會

壬寅早暴風可畏徙舟稅亭未後解維邑官置酒曲江
僧寺二鼓後散

癸卯早遣印司急足周權持辭免文字之臨安行三十
里遇漕司所假舟徙焉晡時宿小橋

甲辰早次隆興府帥吳明可漕任希純魯李欽相迓於

南浦亭夜大雷風雨甚可駭張彥自永和來

乙巳赴二漕會

丙午赴府會於南園

丁未赴黃季文參議會

已酉赴府會於東湖孺子亭按洪留職方乘云湖在郡東南周廣五里酈元云十里一百二十步今士大夫家多創樓閣以環之城中西觀也酒三行泛舟過絕持院本唐僧子畋所造畋精太乙術能祈雨乞晴今有井祈

求不廢雷堂之後有澹臺滅明墓芻云史記雖言滅明

居楚又有渡江斬蛟之事然豫章非真楚尚可疑也

江平

亦有澹臺墓院中老僧年七十及從徐師川游能寫字鼓琴

自總持過講武亭復登舟勸酬歸飲南園夜分散

庚戌諸公來別遣周忠厚張彥歸廬陵即解維過樵舍
鎮監官承節郎范淵來迎宿昌邑山

五月辛亥朔風雨姚媪忌辰午後抵吳城山謁廟少休看
經閣方知東坡所留石砮尚在取而觀之近歲過客又

捨一矢形稍大而色青不若舊物之古也廟側有聖池
池中有小石浮水面祝史云買撲三年為界每年四百
千省納隆興公庫晉江朱丞彭年送別於此

壬子早陰霾風逆行二十餘里而晴風色亦順揚帆頗
駛未後抵南康軍太守錢奉直端立恤之簽判王朝散

崧

灘州人

星子鍾令並相候

癸丑早肩輿過簡寂觀門外許堅石初為沙石所堙前
歲大水復出與觀主歐陽齊年對泉石小酌食甜苦笋

名不虛得齋年求詩為賦一篇疏食山間茶亦甘况逢
苦笋十分甜君看齒頰留餘味端為森森正且嚴飯罷
道入棲真觀即梁昭明書堂前欲游而未至者荒蕪殊
甚次至開先主僧虛席殊不成叢林而飛橋已為大水
所衝少憩方丈首座川僧文逸粗可語同訪招隱泉有
亭復之矣日斜歸

甲寅赴軍會坐五老亭甚久而晴嵐晻曖殊不滿人意
晚土人及永和王忠各以兩舟競渡

已卯凌晨冒大雨陸行四十里至延真昭德觀

知觀陳拱微

與江州樂順教授相會飲菖蒲酒五行同登閣而別由

間道渡溪入淨慧院

主僧淨一

此兩處皆前歲未至者未後

出山泥塗殊險以勞勩晚投宿尋真觀與道士湯善翔

小酌雲錦閣步行近一里至雲澤廟望詠真湫

丙辰晴早過白鶴觀棲賢寺愈蕭索主僧數易故也獨

登五老亭坐玉淵及三峽橋而行約十里飯羅漢院院

不經兵火而住持不得人日就摧毀近者長老方葺僧

堂又引去今藏殿法堂童行堂之屬氣象猶壯偉未時
還軍別太守而下欲解維南風太高遂止

丁巳旦離南康風順而高舟過大孤軒簾可畏午後次
湖口縣略艤岬即行日正午泊交石峽舟人欲止姑聽
之晚有暴風雨

戊午早以風逆巳時方解舟過馬當泊波斯夾約行百
餘里

巳未風正揚颿而下午後以鴈汊風猛而橫泊對岬港

中移時復行三十餘里泊懷家渡是日約行二百餘里
辛酉早北風未止行四十里至大雲倉移時浪稍平又
行四十里至蔣家汊遂止夜月佳甚風稍定

壬戌早復有北風拋過南岬而浪稍平遂行四十里至
池口市鹽酪復行八十里未後至大通鎮雲氣稍變舟
人遂止池卒李臻參肩輿游九華者勞以尊酒思丁亥
之遊今復遙望山色眷眷不已五更後大風自西來繼
以大雷雨舟搖蕩不可止川船相去絕數丈沉焉予舟

本泊於彼臨夜稍徙僅免於難

癸亥早南風掛颿行近四十里片雲忽在頭上轉為北風兩舟相望篙師皆失色無措急令轉拖就颿逆行十餘里入銅陵夾方定午時至銅陵縣泊繡衣亭下游天王禪寺今名護法殘僧敗屋不類叢林山谷集有銅官僧舍得尚書郎趙宗閔墨竹一枝筆勢妙絕行為作小詩二首省郎潦倒今何處敗壁風生霜竹枝滿世間劉專翰墨誰為真賞拂蛛絲獨來野寺無人識故作寒崖

雪壓枝想得平生藏妙手只今猶在髻如絲詩與竹皆
不復存寺後山上有富覽亭望江流凡三夾對岬即濡
湏也五里有寶雲寺李白祠堂在焉十里有銅坑知縣
右承務郎閻晟相候德天郎中之子也邑在亂山中殊
陋

甲子北風復作夜來月色如畫波伏不興今乃阻滯如
此閻宰送別石龍磯磯下有洞雖為三門而淺局無足
觀稍前江邊有馬碯石行三十里入丁家夾過板子磯

晚抵繁昌縣泊於對岸是日約行百里沂流之颿相属
既泊而輒定

乙丑早風復作行夾中約四十里近月子港而止過此
復出大江故也

丙寅風定鷄再鳴乘月解維過三山磯入青燈夾望魯
江口遂入蕪湖泊吳波亭下日向西矣知縣呂通直昭

問忠穆公孫丞韓承務琳主簿徐廸功士龍宣州人尉王廸功

椿嚴州人並相候

丁卯雨略至吉祥寺長老師勤庸人王尉云蕪湖絕無
士人秋試不滿百未有登科者近世兩人發解又寄產
云夜大風

戊辰風雨稍止晨發蕪湖過褐山磯又遇和州裕溪河
截稅之舟紛紜愈甚至投瓦石久之方去未時次太平
州太守周元特倅葉朝請替添倅錢宗丞佃教授吳文
林博古添差教授楊文林恂判官趙文林子覲推官趙
從事不役知錄趙修職多燦司理虞廸功僧司戶林廸

功顯司法王從政豫當塗宰王通直權主簿林勛功浩尉趙修職彥麒路分都監宋又夫寔添差分路孫大夫諒及其子閤門祇候顯祖同年丁憂趙司法彥革並相候

已已赴州會風雨不已天氣如暮秋借郡舟易豫章者庚午新徽州通判劉大夫授之盛秀才旦相候再赴州飯初約會於凌歊風雨而止飯罷獨往北舊塔加葺之後又創懷古堂恨烟雨不見歷陽略至廣福寺長老惠

明

辛未早詣天度觀萬壽寺滿散天申節次趙錫宴日欲
晡畢晚元特講通家之禮二鼓後歸是日雖時有微雨
而其晴也以訖事

壬申早雨俄晴州行小河甚駛至採石鎮以雲氣駁雜
少留已而復行泊慈湖夾方午未間也東坡有阻風五
絕句即此

癸酉早行飯後入鷺港午時泊新河口

甲戌風色不可行黃圮老運使自城中來使志道侍郎以發運使過九江伺其出城以小舟謁之

乙亥赴圮老會於清涼寺寺有德慶堂李主所書聞左僕射陳俊卿以大觀文知福州

丙子早乘便風出新河午時過長蘆寺漲水江溢去寺才十餘步不暇游也日欲晡次真州太守王朝請察相候

丁丑早欲行會大雨不敢解赴王守飯於山堂之澄瀾

閣同報恩長老妙湍登塔兩級望金山及揚州大明寺
塔遂同過漕司東園即六一先生為發運副使許元祚
記者去歲淮南運判呂正已即舊址新之所謂拂雲之
亭澄虛之閣畫舫之舟清譙之堂皆具焉添差提刑司
幹官張從政駒教授鄭從事汝諧相候張幹毗陵宜興
人藏古石刻頗富有泰山秦碑奇甚表弟章湓之運幹
適過滁陽見其病子元祚

戊寅早解維已時至鎮江府太守蔡子平直閣通判章

朝請汝陶朝奉之真摠屬史承奉彌正相候晚乘潮方能入閘未至第三閘遇淺而止

己卯早入第三閘而連夕大雨水漲裏閘不開遂止都統制成大尉閔相候是日夏至

閏五月庚辰朔早至丹陽館使客之館也赴蔡守素飯於普照寺長老慧照興化人雨甚稍止携鄧子長及綸上甘露寺不到已八十年鎮江因北固山以為城而寺在山上東坡詩云古郡山為城層梯轉朱欄盡之矣觀

狠石鐵鑊李衛公像舍利塔所謂陸探微師子惟有近
歲盡本餘皆亡矣舊多景樓乃行者堂去年太守陳大
麟侍郎別卜地造樓甚雄壯同長老化昭飯焉金焦二
山在左右而對面瓜洲似勝舊基也

辛巳早同鄧子長冒大風雨登浮玉亭亭在江邊獨山
上或謂此即浮玉山故創亭焉傍有小石山是為鯨山
又其傍有土山堅號土山土紋皆堅故也登舟風益大
衝浪至金山龍游寺長老寶印川人有衆二百棟宇鼎

新寺繞山臨水為屋故諺云金山屋裏山焦山山裏屋
蓋實錄也山門借石牌山為案乃江中三石峰耳其外
小山稍有樹木而烏雀不棲者世傳為郭璞墓或謂石
牌山正為浮玉水漲不能沒唐人於此鑄鏡南岬創亭
者非也別有鷗山以鷗棲得名寺有雄跨堂頗雄偉洪
景伯書顏觀音殿下臨龍淵長老云頃年軍士習水戰
嘗墜石測之深三十二丈而揚子江心深七十餘丈云
會飯於方丈白絲糖黑鹽豉糖豆粥三者山中之精饌

也登妙高臺烹茶壁間有坡公畫像初公族姪成都中
和院僧表祥畫公像求贊公題云目若新生之犢心如
不繫之舟要問平生功業黃州惠州崖州集中不載蜀
人傳之今見於此茶罷上絕頂觀坡及晁無咎題字轉
至頭陀岩頭陀姓裴唐貞元中拾金於山而得名者聞
此岩舊乃蛟窟也中冷泉在水陸堂中聞京口城中井
水皆鹹濁而此獨異至日午觀僧齋畢過歙州門僧榻
皆逼江夏潦方至憑欄眩駭大抵寺之軒窓無不臨水

而此尤可畏戰投餅餌龜鼉畢集初欲自此下焦山而風雨殊未止復衝巨浪還西津亦危道也謁下元水府廟而歸

壬午招進士張大亨為咸媪案脉黃州守楊直閣由義及府學教授熊克並相候午時開閘晡後方抵丹陽館癸未早別諸公道過總領所登供軍堂得江樓苑信亭皆洪景伯所葺也聞府治連滄樓甚佳恨不一至京口多以山為城即城為登覽之所如多景得江連滄之類

雖曰樓臺耳歸而解舟河道隘塞行甚緩送客相見於門已未後晚行三鋪共二十七里宿焉雨不止

甲申早大雨舟行隔堤望練湖記云方四十里鎮江皆所流又南風打頭牽挽者泥淖沒胫未後次丹陽縣

古曲

也令陳從政玠丞沈從事宗契尉汪廸功並相候於北使之館陳德自崑山來天色稍霽順流行三鋪宿柵口乙酉晴早過呂城閘至犇牛鎮水泛閘不開監鎮沈修職元携數十夫自支港盪舟曲折而過晚次常州太守

李元佐大夫通判張仲固一監丞並相候

丙戌赴州會賓客往復不能記換舟遣當所假者

丁亥早赴李守素飯於感闕寺未後解維抵暮僅行十

三里宿小井

戊子南風益高牽挽費力黃昏方次無錫縣宰吳奉議

澧丞趙宣義善仁相候

己丑早謁蔣丞相方務德侍郎張茂才松運使適相值
戴子善祕書子微臺法憂居並訪之午間携家游惠山

住持法皞年七十八矣同上南北閣酌陸子泉水泉龍
淵泉憑水陸池檻觀龜錢而歸赴蔣丞相會

庚寅早方務德張茂才約喻子才避暑惠山留連至夜
凡七飲茶歸邑即行仲賢自崑山來迓

辛卯未後至平江知府汪聖錫提舉常平芮國瑞相候
於姑蘇館

壬辰至從母宅赴府會於齊雲樓池先亭晚招仲賢子
長置酒姑蘇臺勸酬百花洲暴風雨

癸巳同家人赴從母會留連竟日仲賢先還崑山

甲午早赴芮國瑞會夜携家賞月姑蘇臺

乙未王仲謨兄弟及數親舊皆自崑山來

丙申早就百花洲具飯待崑山諸親王節使權相候晚
解維抵門而止

丁酉早出盤門如崑山縣以塘路橋低轉湖濶

土人謂之皇天

蕩正值東南風打頭撐駕甚勞晡時方抵下苧瀆距府

城纔十二里逼暮仲寧自縣來小酌

戊戌終日逆風牽挽進寸退尺一更後方抵崑山柵外
知縣宣教即劉璵監稅武功孫大夫德相候

己亥舟轉而南越兩時方抵妻家王德溫兄弟李四九
將仕五十將仕張察判蒙鄭提幹莘陳教授九思司戶
九德錢塘孫宰聽瑞昌錢簿永弼郁子文並相候夜飲
四鼓散浴而後寢

庚子鄭通判復總幹晉表主簿宗仁郁九一解元并王
點縣仰邊三一解元並相候

辛丑吳丁丞三畏以檄視滂回云崑山管內計田二百四十餘萬畝

壬寅早就東寺具飯待趙常熟及丁丞寺今為安穆皇后功德院賜額曰薦嚴資福長老普璇淳實人也新蕭山尉楊迪功松及其壻新長興尉陳迪功茂英相候癸卯相士三衢徐璿來

甲辰赴仲謨會前吉水莊丞相候

己巳早祭外舅塋午後留李良佐酌平江柯山泉前安

吉丞鄭宣義顧新淮西運幹鄭承事臨國學進士陸日
新並相候

戊申新湖州梅溪監鎮錢廸功永存相候晚赴仲顯會
六月庚戌朔添監趙承節伯祉相候赴觀音菴寂照大
師若欽飯乘雨涼過山寺報謁訪長老僧法回步至塔
院山之絕頂也涼甚

辛亥早赴仲吉會初泊舟外姑宅前而東西照不可過
惟蟠折可避復為橋礙乃移舟南問津晚宿西柵

壬子早隨湖行舟午時泊岸距舊處才十餘步阻於一橋為此迂枉

癸丑國李吳仁傑字斗南携所解古周易及啟事相候甲寅新臨江通判宣教不比相候

辛酉貨齒藥人夏彥興參頗能奕令與仲顯對盛暑永日無以度故也

壬戌招沈寬登仕案牒累日苦脾疾心氣極不能快癸亥體中小快暑甚夜月却清明晉仲謨兄弟露坐小

酌

甲子筮易遇屯之益留李良佐小酌

乙丑晚以小舟入城

丙寅辰後入婁門至從母宅

丁卯飯罷謁汪守館於瞻儀堂

戊辰聖錫云幼年初讀陳無已集有代人乞郡劄子一見便疑為代傳堯俞作後閱傳集果然乃知宿世讀書之說可信聖錫疑無已後身也

乙巳久不收永和書甚懸情今日連得閏月十二日以前三書知十三弟得子不勝其喜小汪云有書號類文隋時集兩漢以來古文多今時所無如曹植文尤衆植集中未嘗載

庚午早赴芮國瑞提舉會謁李直閣簡能舊提刑也是日范至能借大資政醴泉使侍讀使大金求陵寢及正受書儀過此晚謁之姑蘇館

辛未五更別汪聖錫芮國瑞再過從母宅終日雨涼翁

子功監丞相候赴江西帥幕過此也

壬申復熟晡時輜重自崑山來別從母茂之出婁門登府中所借舟為奏事之行晚次吳江縣

癸酉早步過長橋入臞菴主人知縣君份及其子皆死惟二孫在榜蘇養直詩於宜芳亭是日大暑或行或止唯舟人是聽

甲戌早次秀州泊驛亭方務德侍郎權州趙直閣師夔

孫秀王通判朱通直自求侍郎異之子判官鄭從事伯英康叔之曾孫

司理邵修職輶至鄉並相候入城報謁憇精嚴寺晚赴

務德會薦術士劉演談命舊號江西牧童今曰睡覺生

二更解舟

乙亥遁中收王致君正言書轉致四明六十九姑書姑

蓋族叔祖忱之女己丑生嫁黃氏丁亥秋喪夫生四子

長小二郎

直躬甲辰生伯隱

次小四郎

直履癸丑生

次十一郎

直見

己未生

次十四郎

直異乙丑生

三女大姐歸吳氏

年四十六己巳生

二

姐歸王敦禮

年四十二己丑生

三姐歸吳氏

年丙戌死

今居奉化縣

黃郎中宅晚過崇德縣縣令吳從事道夫相候即行

丙子早抵長安開終日伺候啟閉逼暮始能過大暑不可堪夜氣稍涼連夕進棹

丁丑早祇受告命尋抵臨安開飯後入北關門權寓普惠院

俗呼北寺

庚辰春到關亦館此寺僧善倫相別十餘年

矣

戊寅芮國器司業邵伯恭博士款話終日晚魯彥所來談命鄭人也自稱將仕郎魯誠修飲之

七月己卯朔李仁甫肅秘監范至先工部相過仁甫新
除湖北漕

庚辰同年劉文潛煇著作相過劉單資恪繼之胡邦衡
侍郎携具來晚借李德章輦知縣修文巷小宅徙居以
北寺太僻遠也設榻小樓畧無蚊蚋殊覺安寢客云昨
日進呈到國門狀上再三稱能文

辛巳芮國器及沈持要檢正携具來

壬午汪仲嘉大猷王宣子三侍郎張欽夫吏部鄭少嘉

禮部並相候表第三十七監廟澤四一縣尉湖同自上
饒來留款

甲申黃通老尚書尤袤延之宗丞劉重卿及其二子並
相候延之云兩月來自釐務官而上外補貶逐死亡者
僅四十人亦氣數使然留呂伯恭王得卿飯李德章送
白酒甚佳飲魯彥質

戊子留表兄郭元嘉之子模及王得卿飲許季立調汀
州判官訪別

已丑朱老娘來年八十三甚健

辛卯連日腹疾為祟初聞車駕來日孟享景靈既而值雨竟日閣門忽報來早引對病中甚以為憂

壬辰平明入和寧門對於後殿次堂次過六部徧謁長貳郎官次至虞相梁叅府晚赴張欽夫呂伯恭會同坐新秀州守曾原伯逢

癸巳劬勞之日胡邦衡惠詩食素終日講人事

甲午早臺叅次謁四臺官次及二府竟日奔走泥塗中

暮歸寓館應酬暑天勞倦不可言幸腹疾少損

乙未早臺辭畢即出湧金門芮國器沈持要范致先置
餞於柳洲李秀叔彥穎吏部繼至俄報有奉常兼西掖
之除既而乃少蓬翰苑也聞執政進見乞留上曰甚好
但恐立異耳初擬少蓬他日兼掌制上曰便令兼內制
可也秋暑酷甚體有酒夜置舟泛湖賞月二鼓後歸
丙申早受省劄即上辭免狀又受磨勘朝散郎告

戊戌車駕詣景靈宮館中同官相過秘書丞李處全粹

伯卽陳騃叔進張淵叔潛佐劉煒文潛林光朝謙之校
書卽楊興宗似之蕭國梁棟之趙汝愚子直正字丁時
發子章馮田宗義

己亥宰執分詣

庚子受辭免不允劄子

辛丑早入秘書省供職前月秘書簷忽摧少監李仁甫
云昔御史門臺壞而司馬光去今秘閣摧其去乎已
而果除直顯謨閣湖北運副臨安修葺凡用八千緡昨

日方訖工而予今日上初不知也

文忠集卷一百七十